

中国荒政书集成

第九册



国家清史编纂委员会·文献丛刊

国家清史编纂委员会·文献丛刊

中国荒政书集成

主编 李文海

夏明方
朱 泚

天津古籍出版社



本书被列为国家古籍整理出版“十五”重点规划

本书出版得到国家古籍整理出版专项经费资助

高等学校全国优秀博士学位论文作者专项资金资助项目

教育部人文社会科学重点研究基地重大项目清代灾荒研究

中国人民大学“十五”“二一一工程”清史子项目



续刊东省积谷通行

清光绪八年刻本

(清)佚名辑

赵晓华 点校

国家清史编纂委员会出版编委会

(按姓氏笔画排序)

马大正 于沛 朱诚如

成崇德 李文海 陈桦

邹爱莲 孟超 徐兆仁

戴逸

续刊东省积谷通行

通行东省十二属(光绪七年十二月初七日)

为通飭事。照得金穰木饥，天时之丰歉靡定；有备无患，小民之积储宜先。是以本部院下车以来，即飭劝办积谷，以期未雨绸缪。乃闻东省从前办理此事，每多空言塞责，只取各社长甘结一张，即为了事。委员到境，亦只取结销差，并不逐仓盘验。一遇荒岁，便称放粮放粥，动用无存。此等积习，与备荒本旨适相违悖。此次本部院举行积谷，务须实事求是，不准颗粒虚捏。倘各牧令故智复萌，或有前项情弊，一经查出，定即从严撤参。其委员到境，亦须亲赴各乡，逐一验收，不得仅取空结，致干并咎。除^{通飭司}外，合行札飭。札到，该司、州、县即便遵照转飭，核实办理，毋得视为具文，自贻伊戚。凛之。特札。

通行东省各州县(光绪八年正月初十日)

为札飭事。照得积谷一端，不难于劝办，而难于存储。盖各属既无仓廩，又鲜公所，借储绅民之家，经理不得其人，日久必致亏缺。房屋如有渗漏，又属霉变堪虞。此储谷所以难于劝捐者也。现查各州县禀报捐齐积谷者已有九十余处，其余各属亦皆办有成数，亟应妥议善后章程，设法分乡建仓，妥为存储，垂诸久远，庶不失劝办之本意。兹据茌平县张令熙瑞禀陈存储各条，尚为周妥。各牧令似可参酌情形，仿照办理。合行抄录札飭。札到，即便^{通飭一体酌办，毋违}转飭所属一体实力酌办，毋得草率了事。特札。

通行东省十二属(光绪八年正月十四日)

为札飭事。照得通省劝办积谷，除历城、范县未经报齐，此外州县已一律足额，并有多半逾额者。各官绅办事勤速，甚属可嘉。惟其中尚有分储散漫之处，难保无自捐自存之弊，亟应委查明确，以昭核实。除临清、济宁二直隶州并所属六邑一并由司委查外，合行札飭。札到该司，即分飭各本管知府就近委派委员，周历所属，确查四乡存谷是否处处实在，遵照刊章，量为归并，责成各府出具总结，申司备案。仍劝谕绅民，于各乡设法修建总仓存储。如新旧官交替，应于正案交代外，另出积谷无亏印结，以垂久远。本部院不定何时派人抽查，倘有不实，该牧令等并出结之知府同干咎戾。至经管首事，不可令其赔累。凡仓谷每石准留折耗三升，此外不得短少颗粒，违者着赔。以后官司稽查，绅为经理，非荒不动，有借必还。大略如此，并即通飭遵照。特札。

通行东省十二属(光绪八年三月初五日)

为札飭事。照得积谷一端，现均办有就绪，全在经理得人，方不致日久亏缺。本部院于各属禀报此件，谆谆告诫，务须慎选社长，设法归并，又复一再通飭，期于经久。今如李御史所奏，宜求实惠及民，力矫前弊，勿以有用之民财聚而耗诸无用之地，诚为远识。至论牧令身膺民社，亟应实力遵行。倘尚有分存散漫之处，应即酌量归并。经管之绅耆，必须公正可靠。两三年中出陈易新一次，其法莫善于青黄不接时设法平糶，秋后买谷还仓。如遇前后任交接，应于正案交代外，另出积谷无亏印结，申报院司。将来倘有短少，即惟出结之员是问。后任扶同徇隐，一并着追。每届年终，由院司派员抽查一次，以昭核实。本管府州为亲临上司，如有不实不尽情事，即行查报，以凭核办。除分行外，合行札飭。札到，该司、府、州即便遵照，一体转行遵办。特札。

劝捐东省积谷谨陈办理情形疏(光绪八年二月二十日)

奏为劝捐积谷以实仓储，谨将办理情形并各州县捐齐数目恭折具陈，仰祈圣鉴事。窃维民为邦本，食为民天。岁时丰歉无常，防患贵于有备。臣历任江西、浙江、直隶等省，均经飭属劝办积谷，以资缓急。上年蒙恩补授斯缺，到任后因查东省地瘠民贫，并无耕九余三之蓄，各属常平等仓亦因年久动用无存，设遇凶荒，毫无补救。积谷一端，实为目前要务。当飭藩司崇保妥议章程，颁发各属，视县分之大小，定捐数之等差，通飭一体遵办，但求公平，不许抑勒，但期乐输，不计多寡，并先令清查户口，寓保甲于积谷之中，以期地方民生两有裨益。计自动办以来，据济南等十二府州属陆续禀报，邀同绅士按庄查造户籍，先尽殷富，次及农商，设法劝捐，或听量力而输将，或按地亩而酌派，截至本年正月止，计共捐齐谷六十一万四千六百余石，每州县三千余石至一万四千余石不等。按照派数，多有盈余。各绅民见义勇为，足征人心风俗之厚。尚有捐未足额十余州县，约至麦后均可一律报齐。臣飭司分投委验，尚无虚捏情事。惟州县鲜有仓廩，仿照朱子常社立仓之法，各归各庄，暂存富家公所，选择本乡公正绅士妥为经管，仍分飭另筹建仓，量为归并，以垂久远。此后岁事顺成，尚可年年增益，为图匮于丰之计。臣当体察情形，随时核实筹办，以仰副圣主轸念民依之至意。所有劝办积谷情形，理合恭折具奏，伏乞皇太后、皇上圣鉴。谨奏。

光绪八年二月二十九日差弁赍回原折。内开：军机大臣奉旨：知道了。钦此。

恭录行知各属(光绪八年三月初二日)

兵部火票递到军机大臣字寄山东巡抚任：光绪八年二月二十八日，奉上谕：御史李肇锡奏山东办理积谷，宜求实惠及民，灾区应从缓办，俟丰岁再行劝集。积成之后，委员盘验，酌量劝惩等语。前据任道镕奏劝办积谷，业已捐有成数，将次一律办齐。惟必须牧令得人，妥为经理，方可历久无弊。该御史所陈各节，自系为核实整顿起见，著任道镕悉心体察情形，妥定章程，严杜弊混，以重农储而裕民食。原折著抄给阅看，将此谕令知之。

钦此。遵旨寄信前来。本部院承准此，合行恭录札知。札到，该司、府、州即便钦遵^转行查照，并将发去火票照例造报。毋违。

计粘抄原奏一纸、发火票一张（臬司）。

此次所办，仍如前次之毫无实际，则不惟徒多劳费，而以闾阎之盖藏供官吏之粉饰，亦甚非立法之初心矣。臣愚以为行此政，必得其人、因其地、明其赏罚而后可。积谷不藏之官而藏之民，非如州县仓储之有关考成也。惟无关考成，故视为具文，听其盈虚。夫食为民天，食耗则困，此而玩视，将何者不玩视？然保聚之责在州县，用人之责在大吏，果皆洁己奉公之牧令，孳孳以民事为急，则虽囤蓄在民，而稽核在官，锱铢取之，岂忍泥沙弃之乎？此所以贵得人也。以民所余，防民不足，必丰稔之地，民力方纾。若如去岁东省被水地方，元气未复，朝廷方下蠲除之诏，官府旋为积聚之谋，无论其无可出，即强使输之，而匮者益匮，支绌已莫救于目前。此等灾区，似宜从缓，俟丰岁再行劝集，取什一于狼戾之时，求水火于至足之地，民无不乐从者矣。至于积成之后，必举绅耆典守，而公正者多不喜事，孰肯甘任劳怨？其踊跃赴功者，太抵欲便私图耳。臣以为宜定考核功罪之法，或三年，或五年，必委廉干人员盘验一次。无耗者赏，酌予花红匾额；缺额者罚，并令如数赔偿，不得含混蒙蔽。如地方官能随时整顿，一邑之内存谷完好者，亦即奏请奖叙，否则记过参撤，庶有所劝惩。难者不畏其难，欺者莫售其欺，而惠被无穷矣。夫积谷原以为民，使谷积而无济于民，其谓何？惟不遽求利而弊必除，预防其弊而利乃久，行之东省而效，行之他省亦岂有不效？臣谨就管见所及，湊陈圣听，可否飭下该抚核实办理，务令谷不虚糜，以重农储而备民食。是否有当，伏乞皇太后、皇上圣鉴训示。谨奏。

覆陈办理积谷情形疏（光绪八年三月十六日）

奏为钦奉谕旨，恭折覆陈，仰祈圣鉴事。窃臣于三月初一日承准军机大臣字寄光绪八年二月二十八日奉上谕：御史李肇锡奏山东办理积谷，宜求实惠及民，灾区应从缓办，俟丰岁再行劝集。积成之后委员盘验，酌量劝惩等语。前据任道镕奏劝办积谷，业已捐有成数，将次一律办齐。惟必须牧令得人，妥为经理，方可历久无弊。该御史所陈各节，自系为核实整顿起见。著任道镕悉心体察情形，妥定章程，严杜弊混，以重农储而裕民食等因。钦此。伏查臣办理积款章程，凡被灾较重之区，概行缓办，只劝成熟村庄。如章邱县上年沿河被水，各村即以殷富之捐输为灾黎之抚恤；历城县仅于城内绅商捐谷四千余石，四乡并未劝捐。此外各属办法，先尽绅富，次及农商，有地在十亩以上者始行量力输将，零星小户不得派捐颗粒。一乡一村之中，凡户口人丁积谷数目，均令造册二本，官为用印，一存州县，一交社长，互相稽察。所捐谷石，或储富家粮店，或借公所民房，派公正衿耆专司其事，酌定年限，轮替接充，无耗者量予奖励，缺额者照数赔偿。如青黄不接之时，由官督同减价平糶，按照册开户口，每人以三斗为率，秋后买补归还。倘值岁荒，分别赈贷，使收掌在民，官难侵蚀，稽查在官，民有责成。此劝办积谷之章程也。嗣因州县鲜有仓廩，各处散存，终非久计，牧令不重以考成，亦恐因循废弛，复经通飭于四乡适中村镇酌量建仓归并，如二三年内未经办理平糶，即出陈易新一次。地方官新旧交换，由后任逐一盘验，于正案交代外，另出积谷无亏印结申报院司。每值年终，由院司派员抽查一

次，预防霉变短少之弊。各州县现均一律遵办，间有数县积谷全储城仓者，系因四乡无宽大公所，建仓复所费不费，谷虽储城，仍派四乡社长轮流经管，不准吏胥藉手。臣详加体察，所议章程与该御史原奏意见相同，似可无庸另议，惟有督饬州县随时妥为经理，总期实惠及民，勿任日久生弊，以仰副（按：原书如此，显有脱漏）。

掌江西道监察御史李肇锡疏

奏为东省办理积谷，宜求实惠及民，请饬该抚认真查核，力矫前弊，恭折仰祈圣鉴事。窃臣闻近来各直省讲求积谷，本朱子社仓之制而变通之，法良意美，诚未雨绸缪之至。计顾社仓第行于一乡，不得其人，法已虚立，况其在天下乎？今之议者皆知积谷之利无穷，然或措置未善，则弊端之起，即在未见利之先，此不可不审思熟计者也。山东自同治八九年间，前抚臣丁宝楨已饬各属举办。其法劝谕之始，官蒞之，囤积之后，绅富司之，以民有者还之民，盖防侵蚀诸弊，意良是也。然如臣所闻，他处未可知。即以臣籍而论，诸城一邑，城关内外所积之谷不下数千石。十余年来，未值凶荒赈贷，亦未经出陈易新，而所入之粟半归乌有，是以有用之民财聚而耗诸无用之地也。不亦大可惜乎？今抚臣任道镕又复檄办，且以严法驭属，办求振作，足见其实心为民。无如民之耳目难欺，往往举前事为口实，辄生疑沮，即绳之以法，龟勉输将，而无征不信，不信弗从，使〔失〕圣主慎重农储之至意。除将原定章程咨送军机处查核外，所有劝办积谷情形，谨恭折据实覆奏，伏乞皇太后、皇上圣鉴训示。谨奏。

光緒八年四月初二日差弁賚回原折。内开：军机大臣奉旨：知道了。钦此。



镇江苏州电报局桃坞同人
收解皖賑征信录

清光绪年间刻本

(清)佚名辑

赵晓华 点校

桃坞赈寓江浙同人收解皖苏赈捐征信录

书 启*

张君筱衫募赈书

桃坞诸善长大人阁下：前者晋直告灾，曾由皖省沈云阁太守倡捐集募，载录征信。现在调署安庆府，顷接来函，谓潜、太、怀、英四县发蛟，冲没者数不可稽。其生者饿病相连，亦将垂毙。倩弟转告诸君，作将伯之呼。因念诸君饥溺为怀，可否函致严佑翁先行往查，如渠以救命墩为辞，则蛟灾为急，轻重缓急在执事自有权衡，无待弟之饶舌也。沈太守原函抄呈台览。

比者上游发蛟，水患流行，潜、太、怀、英四邑均被冲淹，而潜山尤甚，居民飘没者不计其数。其存者类皆衣食居庐什不获一，且以水浸之后，饿病相连，读哀鸿嗷嗷之诗，为神伤者久之。弟先曾置买干饼，令人泝流给发。现在面请薇宪筹拨银米，委员察赈，弟亦垫寄千金，俾资浍注。然默念流离荡析，亟宜赈抚兼施，若仅恃此区区，又安能克善其后乎？因思贵处乐善好施，驰为闻望，尚祈阁下将此情形传告知己，以移民贷粟之风，为集腋成裘之计。我知灾区数万众无不引领而拜仁人之赐矣。

赵渭泉诸君乞赈书

桃坞赈捐先生阁下：前年晋豫赈济，在专处领到捐册，代为捐募，接奉回信，曾蒙奖励。敝省本月初至今，处处发蛟，大雨共十余日，宿松、英山、太湖、望江、怀宁、潜山、桐城、舒城、合肥、庐江、无为、巢县均被水灾，最重之地水涨二丈左右。太湖西乡伤人甚多，石碑铺全行冲去，伤人万外。江西交界之地亦然，景德镇受灾甚重。渭泉于初七日在太湖逃灾，路途不通。从六安、寿州、定远而行，廿二四日始到芜湖。同逃廿七人，仅活五人。现在内河浮出尸首、屋木、牲畜，不计其数。省城官绅赶办大饼、棺木，日夜不停，打捞尸身，闻得已有数千。浙江、汉江亦发蛟水，故灾区水势有增无减，尚有一丈左右，秋收断然无望。即使赶紧水退，房屋器具荡然无存。况现在水并不退，逃灾者一无口粮，天气又凉，衣衫无着。大宪极力捐赈，但恐人手不多，赈捐不足。尊处历年办赈，中外驰名，叨在邻省，伏望飞速劝捐，派人来赈，并须多办麦饼。灾区无物可买，银钱无用也。更须棺木，芦席、衣服、药料，广为施发，功德无量。事势急迫，伏祈从速，即请善安。五月廿五日，灾民赵渭泉、赵敬亭、赵芳之、罗吉祥、罗同安百拜谨启。

复诸君书

顷辱赐书，就悉安属灾况，历历如绘。比者三江两湖均有水患，浙粤蛟水尤甚。徽省情形，弟尤亲见，不独安属四邑被水也。环巢各州县一日夜涨水丈余，为近今十年所未

有。小民荡析离居，非不惻然动念。第数年移赈以来，东南民力竭矣。本地善举，浸以废坠，贫民待食待衣者竟与灾黎等。于此时而言，协赈邻省，鲜不以舍近就远为嫌者。即使人言勿恤，如不足动善士解囊之心何？前此协赈晋豫，皆在朝廷蠲赈之后，水尽山穷，故能如响斯应。今承尊嘱，当将原书抄致各处。倘有设法之处，灾民幸甚，然不敢必也。

致各处善堂绅士书

诸贤长大人阁下径启者：福于五月初间道出庐郡，适遇蛟患。初五六等日，大雨盈尺，滨巢各州县水涨一丈有余，为近今十年所未有。圩岸冲破，田畴淹没，房屋毁败，市肆空虚。居民急切逃生，皆乘浴盆而出，衣服粮食不及携带。惨惨之声，哀哀之状，殊觉伤心蒿目。初八九日，雨势稍杀，方冀蛟水渐退，转危为安。比归吴门，接读沈云阁太守、张筱衫、广文、赵渭泉诸君书，方知安庆所属潜、太、怀、英等县，即因巢湖上游蛟水氾滥，且复淫雨经旬，遂致民居漂没，不计其数，幸存者亦皆荡析离居，嗷嗷待哺。又接扬州严君佑之书，慨然以往赈为己任，并言救灾如救火，迫不及待，拟由上海、苏州、扬州三处各垫银五千两驰往开办等语。既钦高义之可风，复虞垫款之莫措。第念事关重大，敢因此处之艰难，稍阻各处之意气乎？窃不自量，业已如数允许。然福等皆一寒诸生耳。往昔协赈，赖将伯之助予；此际筹捐，难再三以相渎。事因目击，敢献清听。倘有善士解囊，仍乞代为募集，即寄苏、沪、扬、镇各电报局代收代解，感谢私衷，实无既极。所有收到捐款，即掣奉收票，并登《申报》为凭。解交严君散赈后，即由严君将收支总数登报，藉资征信。肃请台安，伏乞垂鉴，同人会启。

壬午奇水纪事(采录《申报》) 怀宁姜继襄曙东

天潢几日洗櫓枪，又见狂澜砥柱倾。转眼鱼龙成大劫，伤心蝼蚁剩余生。疮痍亟望筹安抚，泽洞何尝累圣明。幸倾鸿慈蒙帝力，不须铁弩射长鲸。

茫茫天怒可如何，惨共悲声到汨罗。(怀宁石碑于五月初六日陡遭大水。)老弱已难沟待转，(水势促高数丈，声如吼雷。)乾坤疑剩土无多。谁同饥溺忧三载，畴莫洪荒导九河。忍听哀鸿啼不止，在山泉亦作风波。

人鬼喧阗黑夜高，居然同室起波涛。浇漓敢望天开眼，斥卤俄成地不毛。莫障金隄沈白马，似掀沧海失神鳌。五更钜野看鱼沸，瓜蔓声中风怒号。(二十一日子刻大风怒作。)

世界真同大海沓，含冤万鬼哭龙舟。方填屈子湘潭恨，忽报文翁石室秋。民舍陡如穷鸟散，浮尸群与乱鱼游。雪湖那似黄河水，倒挽长江天上流。(潜山地高，向无水患。忽于端午日遭水，北门溃裂，城内死者不过百余人。沿流而下者，则不知其数矣。)

连声揭屋复颓墙，簇簇虫蛇已近床。精卫岂能衔木石，麻姑无故话沧桑。争船群似鸦投树，(初六日更后水势如山，居人不及防备，屋多随水去矣。初七晨始敢放船援救。)援木都如鼠伏梁。(初六天地昏黑，大浪奔腾，人多援木顺流呼救，闻之惻然。)不是奇殃关气运，几谁村落看汪洋。

鼎沸巢焚死又回，重隄纷作浪花堆。(堤身尽溃。)颠连家类狼胡跋，生克机逢马角哀。(俗以日值马建角则有大水，今果然。)落落人寰无处好，层层天网有谁开？沿村万井膏腴地，不见炊烟半月来。

城市苍皇一夕空，南条竟作吕梁洪。龙宫无泪啼蛟女，水府无心忌祝融。(太湖城外火神祠被水冲去，伤人甚多。)温峤犀然妖欲遁，曹娥魂断鬼犹雄。可怜襁褓谁家子，饱葬江鱼枵腹

中。(妇幼死者尤众。)

炎风飒晚凄其，漂泊枯骸枕路歧。(尸如落叶浮萍。)妇恋孤儿犹在手，鬼无全体但留皮。(尸多腐化。)主存华屋归何速，死伴青蝇吊可知。几日北邙棺罌满，纸钱飞挂野棠枝。

九陌尘沙变洞庭，老蛟吹雨黑风腥。愁霖日月天如醉，息壤怀襄地乏灵。遑说田庐归浩渺，纵存妇孺已丁零。耳边怕听饥鸟语，梦里洪涛陡建瓴。(初六三更，望江西圩突破，人多在梦中也。)

风雨荒林赋大招，杞人涕尽羽潇潇。纯仁助麦襄豪举，郑侠呈图托圣朝。空有安怀论抱负，本来忧乐共刍荛。冥茫谁解苍天意，新鬼呼群夜寂寥。

弭江浙水灾说(采录《申报》) 废园主人

客有问于予曰：子不见夫江苏水灾乎？应之曰：昨过苏州花驳岸，积水漫岸，不能行，江、震、常、昭、昆、新、青浦低田俱淹水中，安得不见？客又曰：子亦见夫浙江水灾乎？兰溪大雨，余杭起蛟，绍兴发水，萧山仅露屋脊，宁波淫雨经旬，温处大雨雹，杭城街道有搭浮桥而行者。则又应之曰：《申报》所载，众目共观，予岂独梦梦耶？客曰：江浙如此，犹可赈皖乎？抑何舍近而骛远也？曰：江浙不水，犹可不赈皖，江浙而尽水，必不能赈皖。惟其已水未水，欲水即水，则断断不能不赈皖。客曰：是亦有说乎？曰：有坐我语。子岁丁丑赈山东，吴中蝗且盈野。有告于蝗者曰：尔毋为患，俾我悉意赈山东。五月二十三日，赈东者甫自烟台开车，吴中大风雨一昼夜，蝗赴死太湖且尽。后有刊蝗不为灾图者，顾子山观察署其端曰：江北蝗蝻，遍地皆是，渡江而南，蔽天而起。蝗不为灾，荷天之祉；人饥我饱，君子所耻。此明证也。戊寅赈豫燕灾，吴中三月朔雨，迄十三日未已，水距岸仅寸。有祷于金龙四大王者曰：请掀吴越淫潦，洒遍燕豫甘澍。我无东顾，用赈邻封。祷三日夜，天津月望雨，且久雨，豫亦雨；吴中既望晴，且久晴，越亦晴，水患亦以免。有知其事者，戏作汇水票寄递。今之天津广仁堂袁董可询而证也。己卯夏六月，赈山西灾，江浙久不雨。治赈者祷于神，期以分毕雨字册五百卷必雨。六月杪，册尽，严君自吴、金君自越，方首涂，甘雨普霈，旱魃不为虐。有赈局征信录雨字册捐可验也。庚辰直隶灾，江浙复大旱，祷神与否不及谗。观其征信录所载，五月二十日分捐册书，有天久不雨，秧田龟坼，倘蒙募款源源，定卜甘霖渥沛，雨随册去，捐共雨来之语。五月二十六日催捐书，有今幸三日甘霖，四乡沾足，千万设法，各惠多金之语。是年不闻吴越灾。由此观之，丁丑、戊寅、己卯、庚辰岁，星凡四易，江浙无岁无灾，无岁不助赈，亦无岁成灾。自上年辛巳直隶停赈后，江北始水灾，常熟又水灾，江阴又水灾，今且遍江浙将罹水灾矣。浙江上年无灾，今且甚于苏，不及是时共出全力，速赈皖灾及诸灾区，江浙断无不水理，断无不大水理。苟能竭力助赈，犹可以为善国。盖钱字，古通泉，水象也。泉能流通，水自不滞，理固有可借镜者。客曰：充子之心，必使各省以被水罹灾，我独以助赈蒙福，揆诸忠恕之道，毋亦君子所不许。曰：是大不然。水旱偏灾，国家代有，但使一省稍有偏灾，各省悉力助之，则今日之被灾者既能不死于灾，异日之救灾者自能虽灾不害。各尽报施之人情，均足消弭夫天患。曰忠与恕实交尽其道，夫奚不可者？客跼予言，即赴电报局索捐册百本，将悉力以募赈也。江浙多好善士，有什百辈继客而起者，西风水退，岁以有秋。江浙之幸，即皖民之幸！不然窃恐予言尽验，而人且目是说为不祥。嘻夫！岂予之心哉！

江北李君维之告灾书

顷接敝友陶寿兄由洲中来信，述及洲圩灾况，惨不尽言。当十七八九等日，北风大作，雨势交加，纷纷破圩。居民无可避徙，潮来不测，皆登高岸之上，露宿风餐，因此毙命者不知凡几。刻下约有廿里，一片汪洋，虽据扬镇出川者迭运馒头等干粮给散，无如杯水车薪，不过仅救燃眉之急。七月初三日大汛，所有未破之圩尚未卜能否保固，斯亦在在可虞。且已破之圩，集水不知何日可退，则乡民之荡析离居，不知何日甫可解此倒悬之势。转瞬秋冬递届，赈给固不可无，而来春之补筑圩堤，所费尤为难措。现闻口岸对江一带，亦破圩廿余里，淹没居民无数，实堪怜悯。是眼前之功德，伏愿仁人君子推饥溺之怀，施相周之德等语。今特录奉台电。

江阴诸君告灾书

本月十七至二十四，昼夜狂风巨浪，海水陡涨六七尺，以致各沙无圩不为冲破，甚至常阴老沙圩岸冲去大半，各乡沿江河田尽行淹没。其尤甚者，莫如盘蓝、栏门、戴子等沙，已成一片汪洋，草房什物随波逐流，妇孺奔避无所，淹毙不可胜计。至阡门沙幸蒙去年挑筑土墩圩岸，虽全行冲破，而佃民藉此土墩，赖以生全，无不感仰。第去岁偏灾，尚蒙矜恤，现在沿江南北两岸上下数百里，满眼哀鸿，携老挈幼，栖身无地，呼叫之声，震动山谷，而江边遗骸，更络绎不绝。是以专函奉告，伏祈慨发慈悲，登饥民于衽席，不胜待命戴德之至。

常州同人告灾书

天灾流行，詎知敝处自小河黑沙洲起，直至江阴，沿江而下，沙田均被淹没，桃花港等处为最。刻下该处灾黎家产荡尽，夜宿露天，约七千余人，江北及靖江等尚未在内，待哺嗷嗷，情形可惨。现幸郡中诸善士送米麦麻糕药物等件，速行运往，查户设厂。似此情形，必得养至明春始能遣散，然搭屋发种等款，尚须续筹也。

常熟沙洲告灾启

六月十七八等日，江水骤涨，濒江之江阴、靖江、常熟三县各沙滩被水冲淹，不特屋庐田圩尽为泽国，即尸身漂没，悉饱鱼腹。现闻毗陵绅士筹集巨贖，先赈江阴、靖江两邑，而常熟一隅，尚未举办。近接来函，知被灾甚剧，经费日繁，不得已仿照成法，以一百文为一愿，只捐一次，十百千愿，各随心力，汇解灾区，列入报销。

带收沙洲赈捐启

启者：各属沙洲，于数日前风潮为患，人口各有损伤，田房实遭淹没。现因各处善士谊切梓桑，囑为拨济。因思皖灾重于沙洲，岂容移拨？万不得已，垫款分解散放，随时收捐归补。倘有仁人专捐沙洲现在灾赈者，敝处可以代为收解，另掣收票，俾与皖捐不相混淆。仍一体刊登《申报》，伏乞公鉴。同人公启。

劝募棉衣启

启者：本年各省水灾，其轻重之分，安徽伤人万数，江西、浙江均及千人，江苏各沙约及百数。其幸存待救者，约视死伤之数数十倍。皖省苏沙，除大宪筹赈外，各有善士协赈。惟念秋风一起，则饥寒交迫，谋食兼须谋衣。凡我同人，拟为酌助，惟是独力难支，众擎易举。拟合万人善会，每会捐洋一元，会数多寡，惟力是视。倘有同仁惠助，请交间门外渡僧桥下塘杨乾丰夏布行，掣奉收条，即为代制棉衣分解。如蒙俯允，功德无量。吴亮采、杨春坡同启。

赈款分解皖苏启

启者：严君佑之来函云，英山事竣，再赈一县，即行归办海堤。海堤者，即江北救命墩，现拟联墩为堤也。同人公同集议，现收皖捐，自应专解周君裁五散放冬赈。惟苏省各沙被災虽轻于皖，催赈反甚于皖。事经分任，欲求摊解匀当，实无其道。万不得已，拟除八月以前所收赈款截清分解，自九月朔为始，如蒙善士助赈，当以五成解交周君裁五查放皖赈，以五成解交严君佑之，或以工代赈，修筑海堤，或通盘察酌，分拨沙洲，以免不均之患。至于各沙助赈，扬、镇、通、泰本由扬镇诸君筹办，常州、武阳等邑本由常郡绅士筹办，江阴等处本由上海电报局筹办，常熟、昭文本由苏城泰昶庄周急局筹办，浙省赈务本由大宪委员勘办，并由厘捐总局筹收捐款。如蒙指捐各处，请即径寄前途，以期确当。先此声明，统惟垂鉴。

元魁夺标会章程

一、是会虽为筹赈起见，而于新贵会试，亦足少壮行色。与其将来广分朱卷，何如此际筹捐助赈，较为事半功倍。即使家道殷实，亦可将程仪分赠同年寒士。与不伤惠，取不伤廉，与广东闹姓、吕宋彩票情节迥异，想赴试诸君无不欣然乐助也。倘因推募赈款无所藉手，则有募赈副启在，可向赈寓函索。

一、各省文武乡试诸君，均可与会。每会自输程仪洋一元，再募赈洋九元，合成十元为一会，或减半为半会。因票据刻定一会、半会字样，不能短缺，共以一万会为限。所得程仪洋一万元，交存上海银行，以待分送程仪之用；所得赈捐洋九万元，分交助赈诸君，散放灾区。

一、除助赈者无关得失外，凡助会诸君高中解元者，得程仪洋五百元，魁选得四百元，举人得三百元。倘中数过多，则俟榜发后汇合统算，尽数匀摊，各得若干，临时登明《申报》。一人而助数会者，程仪只得一分。此项程仪，出诸同学诸君，会款与赈款毫无侵涉，心安理得之钱，尽可笑纳。倘助会者迟至下科高发，所助会洋一元不能索回。

一、是会初为皖赈而设，现因扬、镇、常、苏各沙被災，不能不通筹兼济，拟以七万元济皖赈，二万元济沙洲及救命墩工赈等用。试以皖北四十万灾民、各沙三万灾民计之，已未免厚苏而薄皖矣。好善诸君勿再以同室乡邻之义相绳责，况此款系各省捐助也。

一、凡与试诸君，籍隶直晋秦三省，或在本省，或在顺天乡试者，会款均交天津广仁堂内赈寓。籍隶苏皖浙三省，或在本省，或在顺天乡试者，会款均交苏州电报局内赈寓。籍隶两湖、两广、闽、川、豫、汴、陕、甘、云、贵十二省，或在本省，或在顺天乡试